

Na osnovu člana 51. tačka a) Zakona o visokom obrazovanju («Službene novine Tuzlanskog kantona broj: 08/08, 11/09 i 12/09), člana 18. stav (1) tačka a) Zakona o Univerzitetu u Tuzli («Službene novine Tuzlanskog kantona» broj: 09/08, 8/10 i 7/11), člana 72. stav (1) tačka d) Statuta Univerziteta u Tuzli, (Prečišćeni tekst), Uredbe o uslovima i načinu korištenja sredstava reprezentacije («Službene novine Tuzlanskog kantona» broj: 4/05) i Poglavlja III Smjernica za uspostavu i jačanje interne kontrole kod budžetskih korisnika («Službene novine Federacije BiH», broj 19/05), na prijedlog Rektora Univerziteta, Upravni odbor Univerziteta u Tuzli, na sjednici održanoj 27.10.2011.godine, d o n o s i :

PRAVILNIK O POKLONIMA I REPREZENTACIJI

Član 1.

Ovim Pravilnikom uređuje se način i postupak korištenja sredstava reprezentacije na Univerzitetu u Tuzli (u daljem tekstu: Univerzitet).

Član 2.

(1) Pod sredstvima reprezentacije u smislu ovog Pravilnika podrazumjevaju se sredstva namijenjena za plaćanje roba i usluga koje se daju bez naknade, kao poklon licima određenim ovim pravilnikom.

(2) Davanje poklona iz stava 1. ovog člana ne može se vršiti u novčanim sredstvima.

Član 3.

(1) Pod robama iz člana 2. ovog Pravilnika, podrazumijevaju se robe sa utisnutim simbolom Univerziteta, cvijeće, umjetničke i druge slike, knjige, topli napici i bezalkoholna pića kao robe koje se daju i uslužuju bez naknade kao pokloni, vodeći računa o uslovima i prilikama u kojima se poklanjaju, te o statusu lica kojima se poklanjaju.

(2) Pod uslugama iz člana 2. ovog Pravilnika podrazumjevaju se ugostiteljske usluge i usluge smještaja u hotelima, restoranima i drugim smještajnim prostorima za lica određena ovim pravilnikom, bez naknade, vodeći računa o uslovima i prilikama u kojima se poklanjaju, te o statusu lica kojima se poklanjaju.

Član 4.

Robe i usluge iz člana 3. ovog Pravilnika mogu se davati bez naknade, kao pokloni predstavnicima drugih Univerziteta iz zemlje i inostranstva, te domaćim i stranim pravnim i fizičkim licima (u daljem tekstu: gosti) pod uslovima utvrđenim ovim pravilnikom i to:

1. prilikom službenih posjeta gostiju Univerzitetu.
2. prilikom službenih posjeta i boravka rukovodećeg osoblja ili drugih ovlaštenih predstavnika Univerziteta kod gostiju.

Član 5.

(1) O potrebi davanja roba i usluga, kao poklona u slučajevima iz člana 5. ovog Pravilnika odlučuju rukovodeći zaposlenici ili drugi ovlašteni predstavnik Univerziteta, vodeći računa o svrsi posjete gostiju ili gostima, uslovima i nivou pod kojima se posjeta obavlja, kao i visini planiranih sredstava za te namjene.

(2) Izuzetno, robe i usluge iz člana 3. ovog Pravilnika mogu se dati bez naknade i zaposlenicima Univerziteta u situacijama kada rektor ocjeni da je to potrebno i opravdano.

(3) Svoje ovlaštenje iz stava 1. i 2. ovog člana rektor može prenijeti i na rukovodećeg zaposlenika, koga ovlasti posebnim rješenjem.

Član 6.

Za plaćene robe i usluge koje se daju bez naknade kao pokloni, na poledini računa ili drugog vjerodostojnog dokumenta na osnovu kojeg je izvršeno plaćanje, sačinjava se službena zabilješka u kojoj se konstatuje za koga je roba ili usluga plaćena, odnosno kome je poklonjena, datum kada je poklonjena i potpis lica koje je dalo poklon.

Član 7.

Ovaj Pravilnik stupa na snagu danom donošenja.

UNIVERZITET U TUZLI
Broj:04-8870-3.4./11
Tuzla, 27.10.2011.godine

PREDSJEDNIK UPRAVNOG
ODBORA

Hasiba Omeragić, dipl.pravnik